



otpannews.kz

1973 ЖЫЛДЫҢ 13 СӘУІРІНЕН ШЫҒА БАСТАДЫ

МАҢҒЫСТАУ



Kaspi Bank
арқылы жазылу

№83 (10483) 23 ҚАЗАН, БЕЙСЕНБІ, 2025 ЖЫЛ

ОБЛЫСТЫҚ ҚОҒАМДЫҚ-САЯСИ ГАЗЕТ



Ардақты ағайын, қадірлі маңғыстаулықтар!

Сіздерді Республика күнімен шын жүректен құттықтаймын!
25 қазан – халқымыздың тарихындағы айрықша күн. Бұл – Қазақстанның дербес мемлекет ретінде өз жолын айқындап, тәуелсіздік пен егемендікке нық қадам басқан сәт. Республика күні – халқымыздың бірлігі мен елдік рухының, азаттыққа деген ұмтылысының мерекесі.
Тәуелсіздік жылдарында еліміз саяси тұрғыдан орнығып, экономикалық және әлеуметтік жағынан айтарлықтай жетістіктерге қол жеткізді. Бүгінгі Қазақстан – халықаралық беделі биік, аймақтық дамудың көшбасшыларының бірі.
Мемлекет басшысы Қасым-Жомарт Кемелұлы Тоқаев ұсынған жаңғыру бағыты – ел дамуының жаңа кезеңі. Президентіміз атап өткендей, әрбір азамат еліміздің өркендеуіне өз үлесін қосқанда ғана халқымыздың болашағы жарқын болмақ. Бұл ортақ мақсат – бәрімізді біріктіретін ұлы мұрат.
Осы мерекелі күні баршаңызға мықты денсаулық, отбасыларыңызға амандық пен бақ-береке тілеймін! Еліміздің еңсесі биік, тәуелсіздігі тұғырлы болсын!
Елдігіміз мәңгі, бірлігіміз берік болсын, қадірлі жерлестер!

Нұрдаулет ҚИЛЫБАЙ,
Маңғыстау облысының әкімі.

ТРАНСКАСПИЙ БАҒЫТЫ – ЕКІ ЕЛГЕ ЖАҢА СЕРПІН



ЕУРАЗИЯНЫ ЖАЛҒАЙТЫН ОРТА ДӘЛІЗ

ҚАЗАҚСТАН МЕН ӘЗІРБАЙЖАН АРАСЫНДАҒЫ СТРАТЕГИЯЛЫҚ ӘРІПТЕСТІК ЖАҢА ДЕҢГЕЙГЕ КӨТЕРІЛДІ. АҚОРДА РЕЗИДЕНЦИЯСЫНДА ҚАЗАҚСТАН РЕСПУБЛИКАСЫНЫҢ ПРЕЗИДЕНТІ ҚАСЫМ-ЖОМАРТ ТОҚАЕВ ПЕН ӘЗІРБАЙЖАН РЕСПУБЛИКАСЫНЫҢ ПРЕЗИДЕНТІ ИЛЬХАМ ӘЛИЕВТІҢ РЕСМИ КЕЗДЕСУІ ӨТТІ.

Кездесу аясында қос ел Президенттеріне Орта дәлізді дамыту жобасы таныстырылды. Ол – Қытай мен Орталық Азия мемлекеттерін Каспий арқылы Әзірбайжан, Грузия және Түркия аумағы арқылы Еуропамен байланыстыратын негізгі көлік-логистикалық бағыт. Қазақстан Президентінің кеңесшісі Әсел Жанасова мемлекеттер басшыларына жобаның қазіргі ахуалы мен алдағы жоспарлар жөнінде баяндап, қазақ және әзірбайжан мамандарының Орта дәлізді дамыту бағытында атқарып жатқан жүйелі жұмыстары туралы мәлімет берді.
Бүгінде Қытайдан Әзірбайжанға жүк 15–18 күн ішінде жеткізіледі. Бұл көрсеткіш Транскаспий бағытының тиімділігін көрсетеді. Сарапшылардың бағалауынша, 2030 жылға қарай осы бағыттағы жүк айналымы үш есеге дейін ұлғаюы мүмкін.
Президенттерге Орта дәліздің тиімділігі мен бәсекеге қабілеттілігін арттыруға, сондай-ақ Еуразиядағы транзиттік рөлін күшейтуге бағытталған нақты шаралар мен бастамалар туралы егжей-тегжейлі ақпарат ұсынылды.

» 3

• БҮГІНГІ САНДА

ЕГЕМЕН ЕЛДІҢ ЕҢСЕСІ БИІК



» 6

КӘСІП БАТЫЛ ҚАДАМНАН БАСТАЛАДЫ



» 8

ИМПОРТТЫ АЛМАСТЫРУ – ОТАНДЫҚ ӨНДІРІСТІҢ ӨЗЕГІ

МАҢҒЫСТАУ ӨНІРІНДЕ ӨНДІРІС САЛАСЫНА ЖАҢА ЛЕП, ТЫҢ СЕРПІН БЕРЕТІН МАҢЫЗДЫ БАСТАМА ЖҮЗЕГЕ АСТЫ. РЕСПУБЛИКА КҮНІ ҚАРСАҢЫНДА АҚТАУ ҚАЛАСЫНЫҢ ӨНЕРКӘСІП АЙМАҒЫНДА ЕКІ ЖАҢА ӨНДІРІСТІК ЦЕХТЫҢ САЛТАНАТТЫ АШЫЛУЫ БОЛДЫ.



Салтанатты іс-шараға Маңғыстау облысының әкімі Нұрдаулет Қылыбай, жетекші мұнай-газ компанияларының және өнеркәсіптік кәсіпорындардың өкілдері талқыланды. Іс-шарада жаңа жобалардың ел экономикасы үшін маңызы, өңірдің өнеркәсіптік дамуындағы орны кенінен талқыланды. Жаңа өндіріс орындары Мемлекет басшысы Қасым-Жомарт Тоқаевтың өңдеуші өнеркәсіпті дамыту, технологиялық тәуелсіздікті күшейту және отандық кәсіпорындарды қолдау жөніндегі тапсырмаларын орындау аясында жүзеге асырылып отыр.
Жобалардың бірі – икемді полимерлі арматураланған құбырлар шығаратын инновациялық цех. Бұл Қазақстанда алғаш рет іске қосылған, осындай үлгідегі толық локализацияланған өндіріс орны болып отыр. Жобаға 3,5 миллиард теңге инвестиция салынған. Цехтың өндірістік қуаты жылына 300 шақырымға дейін құбыр шығаруға мүмкіндік береді. Өндірілген өнім мұнай-газ және химия өнеркәсібінің қажеттіліктеріне арналмақ.
Екінші цех болат және сорап-компрессорлық

құбырлардың ішкі бетіне антикоррозиялық жабын жағуға маманданған. Мұндай технологиялық шешім құбырлардың беріктігін арттырып, олардың қызмет ету мерзімін ұзартады. Бұл жобаға 5 миллиард теңге инвестиция құйылған, ал өндірістік қуаты жылына 600 шақырымға дейін өнім шығаруға есептелген. Мұндағы өнім мұнай, газ және жоғары қысымдағы химиялық сұйықтықтарды тасымалдау кезінде қолданылады.
Маңғыстау облысының әкімі Нұрдаулет Қылыбай жаңа өндірістік нысандардың іске қосылуын өңірдің экономикалық әлеуетін арттыру жолындағы маңызды қадам деп бағалады.
– Осындай заманауи өндіріс орындарының ашылуы – Мемлекет басшысының жүйелі өнеркәсіптік саясатының нақты нәтижесі. Бұл өңір экономикасына жаңа тыныс беріп, жергілікті кадрлардың дамуына мүмкіндік тудырады. Ең бастысы – өз елімізде өндірісті күшейту арқылы ұлттық өнеркәсіптің тәуелсіздігін нығайтамыз, – деді өңір басшысы.

Өз тілшіміз.

• ҚЫСҚА-НҮСҚА

КЕЛЕШЕК МЕКТЕБІ АШЫЛДЫ

Мұнайлы ауданының Айрақты ауылында 900 орындық №21 мектеп ашылды. Бұл – «Келешек мектептері» жобасы аясында облыстағы он бірінші мектеп. Білім ордасында 45 кабинет, STEM, робототехника және инклюзивті білім беру бөлмелері бар. Жыл соңына дейін Ақтау мен Жаңаөзенде тағы екі мектеп ашылады.

КАСПИЙ АСТЫМЕН ЦИФРЛЫҚ КӨПІР

Каспий арқылы өтетін оптикалық кабельдің үлгісі әзірленіп жатыр. Бұл туралы «Қазақтелеком» акционерлік қоғамының басқарма төрағасы Бағдат Мусин Үкімет отырысында мәлімдеді. «Жақында зауытта кабельді құрастыру басталады. Келесі жылдың мамыр айына дейін кабель Каспий теңізіне дейін жеткізіледі. Төсеу жұмыстарын жаздың соңына дейін аяқтауды жоспарлап отырмыз», – деді Бағдат Мусин.

100-ДЕН АСТАМ ІС-ШАРА ӨТЕДІ

Маңғыстау облысында 25 қазан – Республика күніне орай 100-ден астам мәдени-спорттық іс-шара өтеді. Аталған жоспар төрт негізгі бағытты қамтиды. Олардың қатарында ұйымдастыру-дайындық іс-шаралары, ақпараттық-имидждік жұмыс, салтанатты іс-шаралар және жалпы республикалық іс-шаралар бар.